

宋

史

三二



志卷第七十

宋史一百十七

開府儀同三司上柱國錄軍國事前署右叡籍監修國史領經筵事都總裁范充等奉  
勅修

禮二十 賓禮二

入閣儀 明堂聽政儀肆赦儀

皇

太

后

垂

簾

儀

明堂聽政儀

肆

赦

儀

皇

太

子

正

至

受

賀

儀

皇

太

子

與

百

官

師

保

相

見

儀

入閣儀唐制天子日御正衙以見群臣必立仗朔望  
薦食陵寢不能臨前殿則御便殿乃自正衙喚仗由  
宣政兩門而入是謂東西上閣門群臣俟於正衙者  
因隨以入故謂之入閣五代以來正衙既廢而入閣

亦希闕不講宋復行之建隆元年八月朔太祖常服御崇元殿設仗衛文武百官入閣始置待制候對官乃以工部尚書竇儀待制太常卿邊光範候對仗退賜食廊下乾德四年四月朔帝服通天冠絳紗袍御崇元殿視朝設金吾仗衛群臣入閣太宗淳化二年十一月詔以十二月朔御文德殿入閣令史館修撰楊徽之張洎定為新儀前一日有司供帳於文德殿宋初曰文明是日既明先列文武官于殿庭之東西百官軍校行軍副使等序班於正衙門外屏南階下次御史中丞三院御史序立中丞獨穿金吾班過揖兩班

一揖歸本位次監察御史兩員監閣於正衙門外屏  
北階上北面立次中書門下文明翰林樞密直學士  
兩省官分班立次司天奏辰刻次閣門版奏班齊皇  
帝服韃袍乘輦至長春殿駐輦樞密使以下奏謁前  
導至文德殿殿上承旨索扇捲簾皇帝升位扇却儀  
鸞使焚香次文武官等拜次司天鷄唱次閣門勘契  
次閣門使奉旨呼四色官喚仗南班有辭謝者再拜  
先退中書門下班對揖序立正衙門外屏北階上次  
翰林學士兩省官中丞侍御史序立次金吾將軍押  
細仗入正衙門後橫行拜訖分行上黃道仗隨入金

吾將軍至龍墀分班揖訖序立次吏部侍郎執文武  
班簿入對揖立次中書門下學士兩省御史臺官入  
北面拜訖上黃道將至午階駕韁急趨赴丹墀彈奏  
御史至吏部侍郎南便落黃道急趨就位起居郎舍  
人至兵部吏部侍郎後急趨而進飛至香案前皆揖  
訖序立次金吾大將軍先對揖並鞠躬駕韁行至折  
方石位又對揖北行至奏事石位鞠躬一員奏軍國  
內外平安倒行就位次引文武班就位揖訖鞠躬駕  
韁急趨入沙墀次引侍從班橫行宰相祝月起居畢  
分班序立文武兩班出序立於衙門外刑法待制官

赴監奏位中書門下夾香案侍立兩省御史臺官學  
士兵部吏部侍郎金吾將軍監閣御史並相次出就  
衙門外立惟學士立側北候宰相中書門下詣香案前奏曰

中書公事臣等已具奏聞訖乃退揖數出次刑法官  
待制官各奏事並宣徽使答訖乃出就班次彈奏官  
左右史出閣內失儀者彈紀如式彈奏官失儀起居  
郎糺之起居郎失儀閣門使糺之閣門使失儀宣徽  
使糺之凡出者皆駁韙急趨揖數次中書門下學士  
就位閣門使宣放仗再拜賜廊下食又再拜次閣門  
使奏閣內無使文武官出殿上索扇垂簾輦還宮其

賜廊下食自左右勤政門北東西兩廊文東武西以北為上立定中丞至本位面南一揖乃就坐食至臺吏贊乃擣笏食食訖復贊食畢而罷五月朔命有司增黃麾仗二百五十人令文武官隨中書門下橫行起居從翰林學士位于參知政事後與節度使分東西揖殿出真宗凡三行之景德以後其禮不行仁宗從知制誥李淑議仍讀時令詔禮官詳定儀注以言者謂未合典禮而罷熙寧三年知制誥宋敏求等言奉詔重修定閣門儀制內文德殿入閣儀按今文德殿唐宣政殿也紫宸殿唐紫宸殿也然祖宗視朝皆嘗

御文德殿入閣唐制常設仗衛于宣政殿或遇上坐  
紫宸即喚仗入閣如此則當御紫宸殿入閣方合舊  
典翰林學士王珪等議按入閣者乃唐舊日紫宸殿  
受常朝之儀也唐紫宸與今同宣政殿即今文德殿  
唐制天子坐朝必立仗于正衙若止御紫宸即喚正  
衙仗自宣政殿東西閣門入故為入閣五代以來遂  
廢正衙立仗之制今閣門所載入閣儀者止是唐常  
朝之儀非盛禮也自是入閣之禮遂罷敏求又言本  
朝惟入閣乃御文德殿視朝今既不用入閣儀即文  
德遂闕視朝之禮請下兩制及太常禮院約唐制御

宣政殿裁定朔望御文德殿儀以備正衙視朝之制  
學士韓維等以入閣圖增損裁定上儀曰朔日不值  
假前五日閣門移諸司辦前一日有司供帳文德  
殿其日金吾將軍常服押本衛仗判殿中省官押細  
仗先入殿庭東西對列文武官東西序立諸軍將校  
分入北向立朝堂引贊官引彈奏御史二員入殿門  
踏道當下殿北向立次催文武班分入並東西相向  
立諸軍將校即於殿庭北向立班皇帝服韻袍御垂  
拱殿鳴鞭內侍閣門管軍依朔望常例起居次引樞  
密宣徽三司使副樞密直學士內客省使以下至醫

官待詔及修起居注官二員並大起居諸司使以下  
退排立帝輦至文德殿後閣門奏班齊帝出殿上索  
扇升榻鳴鞭扇開捲簾儀鸞使焚香喝文武官就位  
四拜起居鷄人唱時舍人於彈奏御史班前西向喝  
大起居御史由文武班後至對立位次引左右金吾  
將軍合班於宣制石南大起居班首出班躬奏軍國  
內外平安歸位再拜各歸東西押仗位通喝舍人於  
宣制石南北向對立舍人退於西階次揖宰臣親王  
以下躬奏文武百僚宰臣某姓名以下起居分引群  
臣以下橫行諸軍將校仍舊立閣門使喝大起居舍

人引宰臣至儀石北俛伏跪致詞祝月訖其詞云文  
武百僚宰臣全衙臣某姓名等言孟春之吉伏惟皇  
帝陛下膺受時祉與天無窮臣等無任歡呼叩頭之  
至歸位五拜閣門使揖中書由東階升殿樞密使帶  
平章事以上由西階升殿侍立給事中一員歸左省  
位立轉對官立於給事中之南如罷轉對官每遇御史臺前期牒請文官  
二員並依轉對官例先於閣門投進奏狀吏部侍郎及法官立於轉對  
官南兵部侍郎於右省班南與吏部侍郎東南相向  
立摺笏各出班籍置笏上吏部兵部侍郎以知審刑官東西院官充法官以  
知審刑大司理寺官充親王使相以下分班出引轉對官於宣制

石南宣徽使殿上承旨宣答如儀次吏部兵部侍郎  
及刑法官對揖出次彈奏御史無彈奏對揖出彈奏如有  
並如引給事中至宣制石南揖躬奏殿中無事喝祗

候揖西出次引修起居注官次引排立供奉官以下  
各合班於宣制石南躬喝祇候楫分班出喝文武官  
等門外祇候出索扇垂簾皇帝降坐鳴鞭舍人當殿  
承旨放仗四色官轍急趨至宣制石南稱奉敕放  
仗金吾將軍并判殿中省官對拜訖隨仗出親王使  
相節度使至刺史學士臺省官諸軍將校等並序班  
朝堂謝賜茶酒帝復御垂拱殿中書樞密及請對官

奏事不引見謝辭班後殿坐臨時取旨其日遇有德音制書御札仍候退御垂拱殿坐制箱出外應正衙見謝辭文武臣僚並依御史臺儀制喚班依序分入於文武班後以北為首分東西相向重行異位依見辭謝班序位餘押班臣僚於班稍前押班候刑法官對揖出分引近前揖躬舍人當殿宣班引轉對班見謝辭並如紫宸儀樞密使不帶平章事參知政事至同簽書樞密院事宣徽使並立於宣制石稍北宰臣親王樞密使帶平章事使相係押班者立於儀石南餘官並立於宣制石南如合通喚閭門使引並如儀

贊喝訖係中書樞密並揖升殿辭謝揖西出其合問

聖體者並如儀餘官分班出

彈奏御史候見謝辭班絕對捐出其朝見如謝

都城門外御筵及召赴閣謝茶藥撫問之類不可合班者各依別班中謝對賜酒食等並門賜其係正衙見門謝辭亦門外唱放

應正衙見謝辭臣僚前一日於閣門投

詣正衙榜子閣門上奏目又投正衙狀於御史臺四

方館應朔日或得旨罷文德殿視朝止御紫宸殿起

居其已上奏目正衙見謝辭班並放免依官品隨赴

紫宸殿引或值改依常朝文德殿自有百官班日並

如舊儀應外國蕃客見辭候喚班先引赴殿庭東依

本國職次重行異位立候見辭謝班絕西向躬舍人

當殿通班轉於宣制石南北向立贊喝如儀西出其酒食分物並門賜如有進奉候彈奏御史出進奉入唯御馬及擔床自殿西偏門入東偏門出其進奉出入文武官起居舍人通某國進奉宣徽使喝進奉出歸次如候進奉出給事中奏殿中無事出其後殿再坐合引出者從別儀其日賜茶酒宰臣樞密於閣子親王於本廳使相宣徽使兩省官待制三司副使文武百官皇親使相以下至率府副率及四廂都指揮使以下至副都頭並於朝堂如朝堂位次不足即管於朝堂門外設次軍節度使至四廂都指揮使節度使兩使留後至刺史並於客省廳詔從所定

徽宗初建明堂禮制局列上七議一曰古者朔必告廟示不敢專請視朝聽朔必先奏告以見繼述之意二曰古者天子負扆南向以朝諸侯聽朔則各隨其方請自今御明堂正南向之位布政則隨月而御堂其閏月則居門焉三曰禮記月令天子居青陽總章每月異禮請稽月令十二堂之制修定時令使有司奉而行之四曰月令以季秋之月為來歲受朔之日請以每歲十月於明堂受新曆退而頒之郡國五曰古者天子負扆公侯伯子男蠻夷戎狄四塞之國各以內外尊卑為位請自今元正冬至及大朝會並御

明堂遼使依賓禮蕃國各隨其方立於四門之外六  
曰古者以明堂為布政之宮自今若有御劄手詔並  
請先於明堂宣示然後榜之朝堂頒之天下七曰赦  
書德音舊制宣於文德殿自今非御樓肆赦並於明  
堂宣讀政和七年九月一日詔頒朔布政自十月為  
始是月一日上御明堂平朔左个須天運政治及八  
年戊戌歲運曆數于天下自是每月朔御明堂布是  
月之政先是群臣五上表請負袞聽朝詔弗允至是  
復再請始從之十一月一日上御明堂南面以朝百  
辟退坐于平朔頒政其禮百官常服立明堂下乘輿

自內殿出負斧袞坐明堂大晟樂作百官朝于堂下  
大臣升階進呈所頒布時令左右丞一員跪請付外  
施行宰相承制可之左右丞乃下授領政官領政官  
受而讀之訖出閣門奏禮畢帝降坐百官乃退自是  
以為常其歲運曆數天運政治之辭文多不載是後  
則各隨歲月星曆氣運推移改而易其辭焉初尚  
書左丞薛昂請凡崇寧以來紹述熙豐政事各條其  
節目繫之月令領于明堂尋詔月之朔使民知寒暑  
燥濕之化而萬里之遠雖驛置日行五百里已不及  
時其千里外當前期十日進呈取旨頒布諸州長吏

封掌俟月朔宣讀之宣和元年蔡京言周觀治象於正月之始和以十二月頒告朔于邦國皆不在十月後世以十月者祖秦朔故也秦以十月為歲首故月令以孟冬頒來歲之朔今不當用請以季冬頒歲運于天下詔自今以正月旦進呈宣讀四年二月太常王黼編類明堂頒朔布政與詔書條例氣令應驗凡六十三冊上之靖康元年詔罷頒朔布政

御樓肆赦每郊祀前一日有司設百官親王蕃國諸州朝貢使僧道耆老位宣德門外太常設官縣鉦鼓其日刑部錄諸囚以俟駕還至宣德門內擇次改常

服群臣就位帝登樓御坐樞密使宣徽使侍立仗衛  
如儀通事舍人引群官橫行再拜訖復位侍臣宣曰  
承旨舍人詣樓前侍臣宣敕立金鷄舍人退詣班南  
宣付所司訖太常擊鼓集囚少府監立鷄竿於樓東  
南隅竿未伎人四面緣繩爭上取鷄口所銜絳幡獲  
者即與之樓上以朱絲繩貫木鶴仙人乘之奉制書  
循繩而下至地以畫臺承鶴有司取制書置案上閣  
門使承旨引案宣付中書門下轉授通事舍人北面  
宣云有制百官再拜宣赦訖還授中書門下付刑部  
侍郎承旨放囚百官稱賀閤門使進詣前承旨宣答

訖百官又再拜舞蹈退若德音赦書自內出者並如文德殿宣制之儀其降御劄亦閣門使跪授殿門外置箱中百官班定閣門授宰臣讀訖傳告百僚皆拜舞稱萬歲真宗宣制有司請用儀仗四千人自承天殿設細仗導衛近臣起居訖則分左右前導之

皇太后臨朝聽政乾興元年真宗崩遺旨以皇帝尙幼軍國事兼權取皇太后處分宰相率百官稱賀復前奉慰又慰皇太后於簾前有司詳定儀式內東門拜表合差入內都知一員跪授傳進皇太后所降批答首書覽表具之末云所請宜許或不許初丁謂定

皇太后稱子中書與禮院參議每下制令稱子便殿  
處分稱吾皇太后詔止稱吾與皇帝並御承明殿垂  
簾決事百官表賀英宗即位輔臣請與皇太后權同  
聽政禮院議自四月內東門小殿垂簾兩府合班起  
居以次奏事非時召學士亦許至小殿時帝以疾權  
居柔儀殿東閣西室太后垂簾處分稱吾唯兩府日  
入候問聖體因奏政事退詣小殿簾外覆奏太后帝  
疾間御前後殿聽政兩府退朝猶於小殿覆奏哲宗  
即位太皇太后權同聽政三省樞密院按儀注未釋  
服以前遇隻日皇帝御迎陽門日參官並赴起居依

例奏事每五日遇隻日於迎陽門垂簾皇帝坐於簾  
內之北宰執奏事則權屏去左右侍衛事有機速許  
非時請對及賜宣召亦許升殿禮部御史臺閭門奏  
討論御殿及垂簾儀制每朔望六參皇帝御前殿百  
官起居三省樞密院奏事應見謝辭班退各令詣內  
東門進榜子皇帝雙日御延和殿垂簾日參官起居  
太皇太后移班少西起居皇帝並再拜三省樞密院  
奏事三日以上四拜不舞蹈候祔廟畢起居如常儀  
簾前通事以內侍殿下以閭門吏部磨勘奉舉人垂  
簾日引應見謝辭臣僚遇朔望參日不坐並先詣殿

門次內東門應擡賜者並門賜之於是帝御迎陽門  
幄殿同太皇太后垂簾宰臣親王以下合班起居常  
制分班十六至是合班以閣門奏請故也禮官請如  
有祥瑞邊捷宰臣以下紫宸殿稱賀皇帝畢赴內東  
門賀太皇太后從之徽宗即位皇太后權同聽政三  
省樞密院聚議故事嘉祐末英宗請慈聖同聽政五  
月同御內東門小殿垂簾至七月十三日英宗間日  
御前後殿輔臣奏事退詣內東門簾前覆奏又故事  
唯慈聖不立生辰節名不遣使契丹若天聖元豐則  
御殿垂簾立生辰節名遣使與契丹往還及避家諱

等曾布曰今上長君豈可垂簾聽政請如嘉祐故事  
蔡卞曰天聖元豐與今日皆遺制處分非嘉祐比布  
曰今日之事雖載遺制實出自德音又皆長君正與  
嘉祐事相似有旨依嘉祐治平故事布語同列曰奏  
事先太后次覆奏皇帝如今日所得旨遂為定式矣  
尋以哲宗靈駕發引太后手書罷同聽斷焉

皇太子元正冬至受群臣賀儀政和新儀前一日有  
司於東門外量地之宜設三公以下文武群官等次  
如常儀典儀設皇太子答拜褥位於階下南向又設  
文武群官版位於門之外其日禮直官舍人先引三

公以下文武群臣以次入就位立定禮直官舍人引  
左庶子詣皇太子前跪請內嚴少頃又言外備內侍  
褰簾皇太子常服出次左右侍衛如常儀皇太子降  
階詣南向禱位典儀曰再拜贊者承傳曰再拜三公  
以下皆再拜皇太子答拜班首少前稱賀云元正首  
祚正長至云天景福維新伏惟皇太子殿下與時同休  
賀訖少退復位左庶子前承令詣群臣前答云元正  
首祚正長至云天與公等均慶典儀曰再拜班首以下  
皆再拜皇太子答拜訖禮直官通事舍人引三公以  
下文武百官以次出內侍引皇太子升階還次降簾

侍衛如常儀少頃禮直官舍人引知樞密院官以下  
入就位立定內侍引皇太子降階詣南向禱位樞密  
以下參賀如上儀訖退次引師傳保賓客以下入就  
位參賀如上儀師傳保以下以次出內侍引皇太子  
升坐禮直官引文武宮官入就位重行止向立典儀  
曰再拜在位官皆再拜左庶子少前跪言具官某言  
元正首祚冬至云天伏惟皇太子殿下與時同休俛  
伏興復位典儀曰再拜在位者皆再拜分東西序立  
左庶子少前跪言禮畢左右近侍降簾皇太子降坐  
宮官退左右侍衛以次出

皇太子與百官相見至道元年有司言百官見皇子自兩省五品尚書省御史臺四品諸司三品以下皆答拜餘悉受拜宮官自左右庶子以下悉用參見之儀其宴會位在王公上與師傅保相見政和新儀前一日所司設師傅保以下次於宮門外道西南向設軒架之樂於殿庭近南北向其日質明諸衛率各勒所部屯門列仗典謁設皇太子位於殿東階下西向設師傅保位於殿西階之西三少位於傅保之南稍却俱東向北上師傅保以下俱朝服至宮門通事舍人引就次左庶子請內嚴通事舍人引師傅保立

於正殿門之西三少在其南稍却俱東向北上左庶子言外備諸侍奉之官各服其器服俱詣閣奉迎皇子朝服以出左右侍衛如常儀軒架作翼安之樂至東階下西向立樂止通事舍人引師傅保及三少入就位軒架作正安之樂至位樂止皇太子再拜師傅保以下答拜若三少特見則三少先拜通事舍人引師傅保以下出軒架正安之樂作出門樂止左庶子前跪稱左庶子某言禮畢皇太子入左右侍衛及樂作如來儀

志卷第七十

志卷第七十一

宋史一百十八

開府儀同三司桂國錄軍國筆事前書委相監修國史領經筵事都總裁賜謚等奉

勅修

禮二十一 賦禮三

朝儀班序  
百官相見儀制

百官轉對

朝儀班序太祖建隆三年三月有司上合班儀太師  
太傅太保太尉司徒司空太子太子太師太傅太保嗣王  
郡王左右僕射太子少師少傅少保三京牧大都督  
大都護御史大夫六尚書常侍門下中書侍郎太子  
賓客太常宗正卿御史中丞左右諫議大夫給事中

中書舍人左右丞諸行侍郎秘書監光祿衛尉太僕  
大理鴻臚司農太府卿國子祭酒殿中少府將作監  
前任節度使開封河南太原尹太子詹事諸王傳司  
天監五府尹國公郡公中都督上都護下都督太子  
左右庶子五大都督府長史中都護下都護太常宗  
正少卿秘書少監光祿等七寺少卿司業三少監三  
少尹少詹事左右諭德家令率更令僕諸王府長史  
司馬司天少監起居舍人侍御史殿中侍御史左右  
補闕拾遺監察御史郎中員外郎太常博士五府少  
尹五大都督府司馬通事舍人國子博士五經博士

都水使者四赤令太常宗正秘書丞著作郎殿中丞  
尚食尚藥尚舍尚乘尚輦奉御大理正太子中允贊  
善中舍洗馬諸王友諮議參軍司天五官正凡雜坐  
者以此為準詔曰尚書中臺萬事之本而班位率次  
兩省官節度使出總方面古諸侯也又其檢校兼守  
官多至師傅三公而位居九寺卿監之下甚無謂也  
其給事諫議舍人宜降於六曹侍郎之下補闕次郎  
中拾遺監察次員外郎節度使升於六曹侍郎之上  
中書侍郎之下餘悉如故乾德元年閏十二月詔自  
今一品致仕官曾帶平章事者朝會宜綴中書門下

班二年二月詔重定内外官儀制有司請令上將軍  
在中書侍郎之下大將軍在少卿監之下諸衛率副  
率在東宮五品之下內客省使視太卿客省使視太  
監引進使視庶子判四方館事視少卿閣門使視少  
監諸司使視郎中客省引進閣門副使視員外郎諸  
司副使視太常博士通事舍人從本品供奉官視諸  
衛率殿直視副率樞密承旨視四品朝官兼南班官  
諸司使者從本品副承旨視寺監丞諸房副承旨視  
南省都事凡視朝官者本品下視京官在其上閑寶  
六年九月詔曰周之宗盟異姓為後此先王所以睦

九族而和萬邦也。晉王親賢莫二位，望俱崇方資夾輔之功，俾先三事之列，宜位宰相上。九年十一月詔齊王廷羨武功郡王德昭位在宰相上，大中祥符元年正月有司上酺宴班位駙馬都尉宮僚員僚皇親大將軍已下行門宰臣樞密使已下頴王皇親郡王侍衛馬軍都指揮使已上以皇親使相皇親節度使皇親觀察留後已下防禦團練刺史三班合為一節度使觀察留後已下防禦團練刺史三班合為一並重行異位詔依所定既而武康軍節度使李端愿言使相亦當合為一班不當獨行尊異詔令閣門

再定而閣門引儀制及以前議為是端愿復伸其議  
自勅妄言乃詔太常禮院與御史臺同詳定禮院言  
常朝起居班次緣祖宗舊制不宜併合從之四年閏  
三月太常禮院閣門言準詔同詳定閣門使李端愍  
所奏閣門儀制宰臣與親王立班坐位分左右各為  
班首宰臣樞密使帶使相或帶郡王弁使相作一行  
總為中書門下班其親王獨行一班者準封爵令兄  
弟皇子皆封國謂之親王所以他官不可參綴檢會  
坐次圖直將宗室使相輒綴親王蓋更張之時未見  
親王遂致失於講求近見朝拜景靈宮東陽郡王顥

亦綴親王班竊恐未安今取到閣門儀制其合班宰  
臣使相在東親王在西分班立又祥符元年宴坐次  
圖宰臣王旦與使相石保吉在東寧主元偓舒王元  
偁廣陵郡王元儼節度使惟吉在西分班坐其元儼  
惟吉是郡王與節度使許綴親王班竊慮當時出自  
特旨今來檢尋元初文字不見在先朝只依祥符元  
年宴坐次圖子親王及帶使相郡王在西為一班臣  
等參詳請依閣門儀制親王在西獨為一班宗室郡  
王帶使相許綴親王立班坐次即係臨時特旨從之  
熙寧二年四月國信所言大遼賀同天節左番使耶

律與赴文德殿拜表言南使到北朝綴翰林學士班  
今來却在節度使之下館伴者諭之始就班時下御  
史臺閣門同詳定奏稱人使不知本朝翰林學士班  
自在節度使之下如遇合班即節度使在翰林學士  
之西差前別為一班立俱不相壓欲且依久來儀制  
體例詔依所定是月編修閣門儀制所言慶曆中改  
文明殿學士為觀文殿學士又置大學士按文明殿  
即今文德殿乃正衙前殿也後唐始置學士序位樞  
密副使之下每遇紫宸殿坐朝則升殿侍立蓋文德  
紫宸通謂之前殿故學士侍立為宜其觀文殿深在

禁中乃與資政端明殿相類而資政端明學士並不  
侍立竊詳慶曆所改職名雖用舊之班著而殿之次  
序與舊義理不同其觀文殿大學士自今遇紫宸殿  
坐朝請更不升殿侍立從之元祐元年五月詔太師  
平章軍國重事文彥博已降旨令獨班起居自今赴  
經筵都堂同三省樞密院事並序位在宰臣之上百  
官轉對自建隆詔內殿起居日令百官以次轉對限  
以二人其封章於閣門通進復鞠躬自奏宣徽使承  
旨宣答拜舞而出著為閣門儀制淳化二年詔自今  
內殿起居日復令常參官二人次對閣門受其章大

中祥符末罷不復行景德三年復詔群臣轉對其在外京官內殿崇班以上候得替先具民間利害實封於閣門上進方得朝見治平中命御史臺每遇起居日令百官轉對御史臺言舊制起居日輪兩省及文班秩高者二員轉對若兩省官有充學士待制則綴樞密班起居內朝臣僚不與尋詔遇轉對日增二員熙寧初閣門言舊制中書省樞密院奏事退再引三班假日則兩班或再御後殿引對多及午刻遇閑經筵即至申未恐久勞聖躬請遇經筵日自二府奏事外止引一班或有急奏及言事官請對即取旨俟罷

經筵日仍舊又言假日御崇政殿每遇辰時則隔班過延和殿再引不待進食至已刻隔班取旨尚許引對請自今隔班過延和殿俟已進食再引遇寒暑大風雨雪即令次日引對詔自今授外任者許令轉對訖朝辭監察御史裏行張戬程顥言每欲奏事必俟朝旨或朝政有關及聞外事而機速後時則已無所及况往復俟報必由中書萬一事干政府則或致阻格請依諫官例牒閣門求對或有急奏即許越次登對庶幾遇事入告無憂失時又以編修閣門儀制所言三衙有急奏許於後殿登對若別有奏陳則報閣

門如常制或假日御崇政殿則於已得旨對班後續  
引且許兩制以上同班奏事元豐中詔尚書侍郎同  
郎官一員奏事郎中員外郎番次隨之不許獨留身  
侍郎以下亦不許獨請奏事其左右選非尚書通領  
者聽侍郎以上郎官自隨秘書殿中省諸寺監長官  
視尚書貳丞以下視侍郎又詔三省樞密院獨班奏  
事日無得過三班若三省俱獨班則樞密院當請奏  
事其見任官召對訖次日即朝辭回任聽旨元祐中  
宰臣呂大防言昨垂簾聽政惟許臺諫以二人同對  
故不正之言無得以入今陛下初見群臣請對者必

衆既人人得進則善惡相雜故於采納尤難帝曰人君以納諫為上然邪正則不可不辨遂詔上殿班當直牒及帥臣國信使副許依元豐八年以前儀制紹聖初臣僚言文德殿視朝輪官轉對蓋襲唐制故祖宗以來每遇轉對侍從之臣亦皆與焉元祐間因言者免侍從官轉對續詔職事官權侍郎以上並免自此轉對止於卿監郎官而已請自今視朝轉對依元豐以前條制又詔自今三省樞密院進擬在京文臣開封府推判官武臣橫行使副在外文臣諸路監司藩郡知州武臣知州軍已下取旨召對臣僚言每緣

職事請對待次旬日遇有急奏深恐失事請自今後  
許依六曹開封例先次挑班上殿仍不隔班又言諸  
路監司朝廷所選以推行法令省問風俗朝辭之日  
當令上殿六曹尚書如有職事奏陳許獨員上殿其  
群臣請對雖遇休假特御便殿聽納既又詔應節鎮  
郡守往令陞辭歸許登對不特審觀人材亦所以重  
外任也可於監司不許免對條下增入節鎮郡守依  
此重和元年臣僚言比年以來二三大臣奏對留身  
讒疏善良請求相繼甚非至公之體詔自今惟蔡京  
五日一朝許留身餘非除拜遷秩因謝及陳乞免罷

並不許獨班奏事令閣門報御史臺彈劾又詔寺監職事上部部上省故得上下維持綱紀所出今後雖係兩制職司寺監不許獨對臣僚言祖宗舊制有五日一轉對者今惟月朔行之有許朝官轉對者今惟待制以上預焉自明堂行視朔禮歲不過一再則是畢歲而論思者無幾請遇不視朔即令具章投進以備覽觀又諸路監司未經上殿者雖從外移先赴闈引對方得之官並從其議

百官相見儀制乾德二年詔曰國家職位肇分軌儀有序冀等威之斯辨在品式之惟明知著位之庶官

及內司之諸使以至軒墀引籍州縣命官凡進見於宰相或參候於長吏既為總攝合異禮容稽於舊儀且無定法或傳晉天福周顯德中以廷臣內職賓從將校比其品數著為綱條載於刑統未為詳悉宜令尚書省集臺省官翰林秘書國子司業太常博士等詳定內外群臣相見之儀翰林學士承旨陶穀等奏兩省官除授假使出入並參宰相起居郎以下參同舍人五品以上官遇於塗斂馬側立須其過常侍以下遇三公三師尚書令引避其值僕射斂馬側立御史大夫中丞皆分路行起居郎以下避僕射遇大夫

歛馬側立中丞分路尚書丞郎郎中員外並參三師  
三公令僕郎中員外兼參左右丞本行尚書侍郎及  
本轄左右司郎中員外御史大夫以下參三師三公  
尚書令中丞兼參大夫知雜事參中丞三院御史兼  
知雜及本院之長大夫避尚書令以上遇僕射歛馬  
側立而避大夫遇尚書丞郎兩省官諸司三品以上  
金吾大將軍統軍上將軍皆分路餘官遇中丞悉引  
避知雜兼避中丞遇左右丞歛馬側立餘皆分路郎  
中及少卿監大將軍以下皆避知雜三院同行如知  
雜之例少卿監並參本司長官丞參少卿諸司三品

遇僕射於途皆引避諸衛大將軍參本衛上將軍東宮官參隔品凡參者若遇於途皆避公參之禮列拜堂上位高受參者答焉四赤縣令初見尹趨庭受拜後升廳如客禮內客省使謁宰相樞密使以客禮閣門使以上列拜皆答客省副使至通事舍人諸司使樞密承旨不答焉自樞密使副宣徽使皆差降其禮供奉官殿直教坊使副辭令官伎術官並趨庭倨受諸司副使參大使通事舍人參閣門使防禦團練刺史謁本道節帥節度防禦團練副使謁本使並具軍容趨庭延以客禮少尹幕府於本院長官悉拜防禦

團練判官謁本道節帥並趨庭上佐州縣官見宰相  
樞密使及本屬長官並拜於庭

天長雄武等軍使見宰相樞密亦如之

參本府賓幕官及曹掾縣簿尉參令皆拜王府官見  
親王如賓職見使長府縣官兼三館職者見大尹同

赤縣令六品以下未嘗參官見宰相樞密及本司長

官並拜階上流外見流內品官並趨庭諸司非相統

攝皆稱移牒分路者不得籠街及占中道依秩序以

分左右遇於驛舍非相統攝及名位縣隔先至者居

之臺省官當通官呵止者如舊式文武官不得假借

呼稱以紊朝制當避路者若被宣召及有所捕逐許

橫度焉又令諸司使副使通事舍人見宰相樞密使  
升階連姓通名展拜不答拜其見樞密副使參知政  
事宣徽使以客禮展拜太平興國以後又制京朝官  
知令錄者見本州長吏以客禮三司判官推官主判  
官見本使如郎中員外見尚書丞郎之儀咸平中又  
詔開封府左右軍巡使京官知司錄及諸曹參軍到  
畿縣見京尹並趨庭設拜六年命翰林學士梁顥等  
詳定閭門儀制成六卷因上言三司副使序班朝服  
比品素無定列至道中筵會在知制誥後郎中前今  
請同諸司少卿監班位在上如官至給諫卿監者自

如本品朝會大宴隨判使赴長春殿起居引駕其朝  
會引駕至前殿與諸司使同退大中祥符五年復命  
翰林學士李宗諤等詳定儀制文武百官遇宰相樞  
密使參知政事並避起居郎以下遇給舍以上欽馬  
御史大夫遇東宮三師尚書丞郎兩省侍郎分路而  
行中丞遇三師三少太常卿金吾上將軍並分路而  
行知雜御史遇尚書侍郎諸司三品金吾大將軍統  
軍諸位上將軍分路而行三院同行如知雜例不同  
行遇左右丞則避尚書丞郎郎中員外遇三師三公  
尚書令則避郎中員外遇丞郎則避太常博士以下

朝官遇本公司長官三師三公僕射尚書丞郎大夫中  
丞知雜御史並避權知判者不避遇兩省給舍以上  
欽馬京官遇丞郎給舍大卿監祭酒以上及本寺少  
監卿司業並避諸軍衛大將軍以下遇上將軍統軍  
亦避詹事遇上臺官如卿監之例庶子少詹事至太  
子僕遇東宮三師三少並避遇上臺官如少卿監例  
中允以下遇東宮三師三少並避遇賓客詹事欽馬  
遇上臺官如太常博士例應合避尚書者並避三司  
使其權知開封府如本官品避其臺省官雖不合避  
而職在統臨者並避武班內職並依此品大觀二年

定王嘉王府侍講沈錫等奏二王出就外學其初見及侍王禮儀講說疏數之節請如故事手詔按祥符故事記室翊善見諸王皆下拜真宗特以張士遜為王友命王答拜以示賓禮今講讀輔翊之官職在訓道亦王友傳也可如例令王答拜群臣赴臺參謝辭者新授加恩  
出使勅尚書侍郎則三院御史各一員中丞大夫皆對拜三院仍班迎不赴  
坐班即不赴節度使賓客太常宗正卿則御史一員中丞大夫皆對拜兩使留後至刺史秘書監至五官正上將軍至郎將四廂都指揮使及內職軍校遙郡以上樞密都承旨及內職帶正員官者

四赤縣令三京司錄節度行軍至團練副使幕職官  
任憲銜者皆御史一員對拜中丞大夫對揖亦令揖得參風憲而退若曾任中書門下及左右丞皆不赴加階

再指

謂

詒進言

亦令揖

謂

亦令揖

謂

亦令揖

謂

亦令揖

勅食邑章服館閣三司開封府職事及內職轉使額  
軍額亦不赴臺謝僕射過正衙日臺官大夫以下與  
百官並詣幕次致賀文官一品二品曾任中書樞密院者不赴大夫中丞  
則郎中少卿監大將軍以下亦然本官約止則不赴都省都

罷此

儀

志卷第七十一

# 志卷第七十二

宋史一百十九

開府儀同三司上柱國錄軍國重事前書右丞相監修國史領經筵事都總裁臣脫等奉

勑修

## 禮二十二 賀禮四

錄周後

錄先聖後

羣臣朝使宴饌

朝臣時節

錄先聖後

羣臣朝使宴饌

金國使副

見辭儀

外國君長來朝

契丹夏國使副

見辭儀

高麗附

金國使副

見辭儀

諸國朝貢

昔周滅殷封微子為殷後俾修其禮物作賓于王家  
與國咸休宋以柴周之後為二恪又錄孔子之後亦  
先王崇德象賢之意也故皆為賓禮其餘則有朝使  
之宴饌歲時之廟餽及外國之使聘遠方之朝貢著

其迓餞宴賚之式登降揖遜之儀備一代之制焉  
太祖建隆元年正月四日詔曰封二王之後備三恪  
之賓所以示子傳孫興滅繼絕夏商之居祀宋周隋  
之啓介鄭古先哲王實用茲道矧予涼德歷試前朝  
雖周德下衰勉從於禪讓而虞賓在位豈忘於烝嘗  
其封周帝為鄭王以奉周嗣正朔服色一如舊制又  
詔曰矧惟眇躬逮事周室謳歌獄訟雖歸新造之邦  
廟貌園陵豈忘舊君之禮其周朝嵩慶二陵及六廟  
宜令有司以時差官朝拜祭饗永為定式仍命周宗  
正卿郭玘行禮乾德六年八月詔於周太祖世宗陵

寢側各設廟宇塑像命右贊善大夫王碩管勾修蓋  
開寶六年三月周鄭王殂詔輶朝十日帝素服發哀  
於便殿十月四日葬周恭帝於順陵詔特輶四日五  
日朝參仁宗天聖六年錄故虢州防禦使柴貴子肅  
為三班奉職七年錄故太子少傅柴守禮孫詠為三  
班奉職其後又錄柴氏之後曰熙曰愈曰若拙曰上  
善並為三班奉職曰餘慶曰織為州長史助教曰貽  
廓等十一人復其身仍各賜錢一萬又錄世宗曾孫  
揆柔及貴曾孫日宣守禮曾孫若訥皆為三班奉職  
嘉祐四年著作郎何禹言昔舜受堯禹受舜之天下

而封丹朱商均以為國賓周漢以降以及於唐莫不崇奉先代延及苗裔本朝受周天下而近代之盛莫如唐自梁以下皆不足以崇襲臣願攷求唐周之裔以備二王之後授以爵命封縣立廟世世承襲永為國賓事下太常議曰古者立二王後不惟繼絕無取其明德可法五代草創載祀不永文章制度一無可攷上取唐室世數已遠於經不合惟周則我受禪之所自義不可廢宜訪求子孫如孔子後衍聖公授一官爵以公號使專奉廟饗歲時存問賜之粟帛牲器祭服每遇時祀並從官給其廟宇亦加嚴飾如此則

上不失繼絕之義度之於今亦簡而易行從之四月  
詔曰先王推紹天之序尚尊賢之義褒其後嗣賓以  
殊禮豈非聖人稽古報功之大典哉國家受命之元  
繼周而王雖民靈欣戴曆數允集而虞賓將遜德義  
不顯頃者推命本始褒及支庶每遇南郊許奏白身  
一名充班行恩則厚矣而義未稱將上采姚姒之舊  
略循周漢之典詳其世嫡優以公爵異其仕進之路  
申以土田之錫俾廟寢有奉饗祀不輟庶幾乎春秋  
通三統厚先代之制矣宜令有司取柴氏譜系於諸  
房中推最長一人令歲時親奉周室祀事如白身即

與京主簿如為班行者即比類換文資仍封崇義公  
與河南府鄭州合入差遣給公田十頃專管勾陵廟  
應緣祭饗禮料所湏皆從官給如至知州資序即別  
與差遣却取以次近親令襲爵授官永為定式八月  
太常禮院定到內殿崇班相州兵馬都監柴詠於柴  
氏諸族最長詔換殿中丞封崇義公簽書奉寧軍節  
度判官事以奉周祀又以六廟在西京而歲時祭饗  
無器服之數令有司以三品服一四品服二及所當  
用祭器給之熙寧四年西京留司御史臺司馬光言  
崇義公紫詠祭祀不以儀式周本郭姓世宗后姪為

郭氏後今存周後則宜封郭氏子孫以奉周祀帝閱  
奏問王安石安石曰宋受天下於世宗柴氏也帝曰  
為人後者為之子安石曰為人後於異姓非禮也雖  
受天下於郭氏豈可以天下之故而易其姓氏所出  
帝然之五年正月柴詠致仕詠長子早亡嫡孫夷簡  
當襲太常禮院言夷簡有過合以次子西頭供奉官  
若訥承襲詔以若訥為衛尉寺丞襲封崇義公簽書  
河南府判官廳公事政和八年徽宗詔曰昔我藝祖  
受禪于周嘉祐中擇柴氏旁支一名封崇義公議者  
謂不當封周然禪國者周而三恪之封不及禮蓋未

盡除崇義公依舊外擇柴氏最長見在者以其祖父  
為周恭帝後以其孫世世為宣義郎監周陵廟與知  
縣請給以示繼絕之仁為國二恪永為定制紹興五  
年詔周世宗玄孫柴叔夏為右承奉郎襲封崇義公  
奉周後二十六年叔夏升知州資序別與差遣以子  
國器襲封令居衢州朝廷有大禮則入侍祠如故事  
其柴大有柴安宅亦各補官淳祐九年又以世宗八  
世孫柴彥穎特補承務郎襲封崇義公時又求隋唐  
及朱氏李氏石氏劉氏郭氏之後及吳越荆南湖南  
蜀漢諸國之子孫皆命以官使守其祀具見本紀世

家

錄先聖後仁宗景祐二年詔以孔子四十六世孫杜  
海尉宗愿為國子監主簿襲封文宣公皇祐三年七  
月詔曰國朝以來世以孔氏子孫知仙源縣使奉承  
廟祀近歲廢而不行非所以尊先聖也宜以孔氏子  
孫知仙源縣事至和初太常博士祖無擇言按前史  
孔子後襲封者在漢魏曰褒成褒尊宗聖在晉宋曰  
奉聖後魏曰崇聖北齊曰恭聖後周隋並封鄒國唐  
初曰褒聖開元中始追謚孔子為文宣王又以其後  
為文宣公不可以祖謚而加後嗣遂詔有司定封宗

憲衍聖公令世襲焉治平初用京東提點王綱言自今勿以孔氏子弟知仙源縣其襲封人如無親屬在鄉里令常任近便官不得去家廟熙寧中以四十八代孫若蒙為沂州新泰縣主簿襲封元祐初朝議大夫孔宗翰辭司農少卿請依家世例知兗州以奉祀又言孔子後襲封疏爵本為侍祠今乃兼領他官不在故郡請自今襲封者無兼他職終身使在鄉里朝議依所請命官以司其用度立學以訓其子孫襲封者專主祠事增賜田百頃共祭祀之餘許均贍族人其差墓戶並如舊法賜書置教授一員教諭其家子

第鄉鄰或願學者聽改衍聖公為奉聖公及刪定家  
祭冕服等制度頒賜之其後通直郎孔宗壽等舉若  
蒙弟若虛襲封仍請自今衆議擇承襲之人不必子  
繼庶幾留意祖廟惇睦族人宣和三年詔宣議郎孔  
端友襲封衍聖公為通直郎直秘閣仍許就任關升  
以示崇獎端友言詔敕文宣王後與親屬一人判司  
簿尉今孔若采當承繼推恩詔補迪功郎高宗紹興  
二年以四十九代孫孔玠襲封衍聖公其後以摺以  
文遠以萬春以洙終宋世皆襲封主祀事

群臣朝覲出使宴餞之儀太祖太宗朝藩鎮牧伯沿

五代舊制入觀及被召使回客省齋籤賜酒食節度使十日留後七日觀察使五日代還節度使五日留後三日觀察一日防禦使團練使刺史並賜生料節度使以私故到闕下及步軍都虞候以上出使回者亦賜酒食熟羊群臣出使回朝見日面賜酒食中書樞密宣徽使使相並樞密使伴三司使學士東宮三師僕射御史大夫節度使並宣徽使伴兩省五品以上侍御史中丞三司副使東宮三少尚書參郎卿監上將軍留後觀察防禦團練使刺史宣慶管政昭宣使並客省使伴少卿監大將軍諸司使以下任發運

轉運提點刑獄知軍州通判都監巡檢回者即賜並  
通事舍人伴客省引進四方館閣門使並本廳就食  
群臣賀賜衣奉慰並特賜茶酒或賜食外任遣人進  
奉亦賜酒食或生料自十月一日後盡正月每五日  
起居百官皆賜茶酒諸軍分校三日一賜冬至二社  
重陽寒食樞密近臣禁軍大校或賜宴其第及府署  
中率以為常大中祥符五年詔自今兩省五品尚書  
省四品諸司三品以上官同列出使並許醵錢餽飲  
仍休假一日餘官有親屬僚友出行任以休務日餽  
送故事樞密節度使使相還朝咸賜宴於外苑見辭

日長春殿賜酒五行仍設食當直翰林龍圖閣學士以上皇親觀察使預坐八年四月侍衛步軍副都指揮使王能自鎮定來朝宴於長春殿閣門言舊制節度使掌兵無此禮例既赴坐則殿前馬軍都校當侍立於品秩非便遂令皆預位中興仍舊制凡宰相樞密執政使相節度外國使見辭及來朝皆賜宴內殿或都亭驛或賜茶酒並如儀

時節餽廩大中祥符五年十一月以宰相王旦生日詔賜羊三十口酒五十壺米麪各二十斛令諸司供帳京府具衙前樂許宴其親友旦遂會近列及丞郎

給諫修史屬官俄又賜樞密使副參知政事羊三十  
口酒三十壺米麵各三十斛其後以廢務非便奏罷  
會而賜如故又制僕射御史大夫中丞節度留後觀  
察內客省使權知開封府正至寒食並客省齋籩賜  
羊酒米麵立春賜春盤寒食神餽鴉粥端午糉子伏  
日蜜沙冰重陽糕並有酒三伏日又五日一賜冰四  
廂及廂都指揮使中書舍人統軍防禦團練使刺史  
客省使樞密都承旨知銀臺司審刑院三司三司勾  
院諸司使禁軍校忠佐海外諸蕃進奉領刺史以上  
至寒食並賜節料立春奉內朝者皆賜幡勝元祐二

年十一月冬至詔賜御筵於呂公著私第遣中使賜上尊酒香藥果實縷金花等以御飲器勸酒遣教坊樂工給內帑錢賜之及暮賜燭傳宣令繼燭皆異恩也紹興十三年十二月二十三日高宗賜宰臣秦檜詔曰省所奏辭免生日賜宴朕聞賢聖之興必五百歲君臣之遇蓋亦千載夫以不世之英值難逢之會則其始生之日可不為天下慶乎式燕樂衍所以示慶也非喬嶽之神無以生申甫非宣王之能任賢無以懋興今日之事不亦臣主俱榮哉宜服異恩毋守沖節所請宜不允

宋朝之制凡外國使至及其君長來朝皆宴于內殿  
近臣及刺史正郎都虞候以上皆預太祖建隆元年  
八月三日宴近臣於廣政殿江南吳越朝貢使皆預  
乾德三年五月十六日宴近臣及孟昶于大明殿開  
寶四年五月七日宴近臣及劉鋹于崇德殿十一  
月五日江南李煜吳越錢俶各遣子弟來朝宴于崇  
德殿八年三月晦宴契丹使于長春殿太平興國二  
年二月十一日宴兩浙進奉使契丹國信使及李煜  
劉鋹禁軍都指揮使以上于崇德殿不舉樂酒七行  
而罷契丹遣使賀登極也五月十一日再宴契丹使

于崇德殿酒九行而罷以其貢助山陵也三年正月  
十六日宴劉鋹李煜契丹使諸國蕃客于崇德殿以  
契丹使來賀正故也三月二十五日吳越錢俶來朝  
宴于長春殿親王宰相節度使劉鋹李煜皆預十月  
十六日宴宰相親王以下及契丹使高麗使諸州進  
奉使於崇德殿以乾明節罷大宴故也是後宴外國  
使為常其君長來朝先遣使迎勞於候館使者朝服  
稱制曰奉制勞某主國主迎於門外與使者俱入升  
階使者執束帛稱有制國主北面再拜稽首受幣又  
再拜稽首以土物賚使者再拜受國主送使者出鴻

臚引詣朝堂兩司奏聞通事舍人承敕宣勞再拜就  
館翌日遣使戒見日如儀又次日奉見于乾元殿設  
黃麾仗及官縣大樂典儀設國主位於縣南道西北  
向又設其國諸官之位於其後兩司迎引國主服其  
國服至明德門外通事舍人引就位侍中奏中嚴皇  
帝服通天冠絳紗袍出自西房即御位典儀賛拜國  
主再拜稽首侍中承制降勞皆再拜稽首敕升坐又  
再拜稽首至坐俛伏避席侍中承制曰無下拜國主  
復位次引其國諸官以次入就位再拜並如上儀侍  
中又承制勞還館通事舍人引國主降復位再拜稽

首出其國諸官皆再拜以次出侍中奏禮畢皇帝降坐其錫宴與受諸國使表及幣皆有儀具載開寶通禮

契丹國使入聘見辭儀自景德澶淵會盟之後始有契丹國信使副元正聖節朝見大中祥符九年有司遂定儀注前一日習儀于驛見日皇帝御崇德殿宰臣樞密使以下大班起居訖至員僚起居後館伴使副一班入就位東面立次接書匣閭門使升殿立次通事入不通喝拜兩拜奏聖躬萬福又喝兩拜隨呼萬歲喝祇候赴東西接引使副位舍人引契丹使副

自外捧書匣入當殿前立天武官擡禮物分東西面  
列入於殿下以東為上舍人喝天武官起居兩拜隨  
呼萬歲奏聖躬萬福喝各祇候閣門從東階降至契  
丹使位揖使跪進書匣閣門側身摺笏跪接舍人受  
之契丹使立閣門執笏捧書匣升殿當御前進呈訖  
授內侍都知都知折書以授宰臣宰臣樞密進呈訖  
遂擡禮物出舍人與館伴使副引契丹使副至東階  
下閣門使下殿揖引同升立御前至國信大使傳國  
主問聖體通事傳譯舍人當御前鞠躬傳奏訖揖起  
北使皇帝宣閣門廻問國主北使跪奏舍人當御前

鞠躬奏訖遂揖止使起却引降階至辭見位面西揖  
躬舍人當殿通北朝國信使某官某祇候見應喏絕  
引當殿喝拜大起居其拜舞並依本國禮出班謝面天顏歸位

喝拜舞蹈訖又出班謝沿路驛館御筵茶藥及傳宣  
撫問復歸位喝拜舞蹈訖舍人宣有敕賜窄衣一對  
金蹀躞子一金塗銀冠一韓一兩衣着三百匹銀二

百兩鞍轡馬一每句應喏跪受起拜舞蹈訖喝祇候應喏

西出凡傳語并奏聖躬萬福致辭並通事傳譯舍人當殿鞠躬奏聞後同次通北朝國

信副使某官某祇候見其拜舞謝賜致詞並如上儀

西出其敕賜衣一對金腰帶一幞頭靴笏次通事及衣着二百匹銀器一百兩鞍轡馬

舍人引舍利已下分班入不通便引合班贊喝大起  
居拜舞如儀舍人喝有敕賜衣服束帶衣着銀器分  
物應喏跪授摶擔床跪起舞蹈拜訖喝各祇候分班  
引出次引差來通事以下從人分班入不通便引合  
班喝兩拜奏聖躬萬福又拜隨呼萬歲喝有敕各賜  
衣服腰帶衣着銀器分物應喏跪授起喝兩拜隨拜  
萬歲喝各祇候唱喏分班引出次行門殿直入起居  
訖殿上侍立文明殿樞密直學士三司使內客省使  
下殿舍人合班奏報閣門無事唱喏訖卷班西出客  
省閣門使以下東出其排立供奉官已下橫行合班

宣徽使殿上喝供奉官已下各祇候分班出並如常儀皇帝降坐還內宴日契丹使副以下服所賜承受引赴長春殿門外并侍宴臣僚宰執親王樞密使以下祇候俟長春殿諸司排當有備閣門使附入內都知奏班齊皇帝坐鳴鞭宰臣親王以下並宰執分班舍人引入其契丹使綴親王班入舍人通某甲以下唱喏班首奏聖躬萬福喝各就坐兩拜隨呼萬歲喝就坐分班引上殿或皇帝撫問契丹使副舍人便引下殿喝兩拜隨拜萬歲喝各就坐次舍人通事分引舍利以下東西分班喝兩拜喝就坐分引赴兩廊下

次舍人引差來通事從人東西分班入合班喝兩拜隨拜萬歲喝就坐分引赴兩廊次喝教坊已下兩拜班首奏聖躬萬福又喝拜兩拜隨拜萬歲喝各祇候次引晉盞二人稍近前喝拜兩拜隨拜萬歲喝上殿祇候分東西上殿立有司進茶床內侍酌酒訖閤門使殿上御前鞠躬奏其甲已下進酒餘如常儀宴起宰臣已下降階舍人喝兩拜擣笏舞蹈喝各祇候分班出次舍利合班喝兩拜舞蹈三拜拜謝訖喝各祇候分引出次通事從人合班喝兩拜隨拜萬歲喝各祇候分班引出次喝教坊使已下兩拜隨拜萬歲喝各

各祇候如傳宣賜茶酒又喝謝茶酒拜兩拜隨拜萬歲喝各祇候出閣門使殿上近前側奏無事皇帝降坐鳴鞭還內辭日皇帝坐內殿起居班欲絕諸司排當有備催合侍宴臣僚東西相向班立崇德殿庭俟奏班齊舍人喝拜東西班殿侍兩拜奏聖躬萬福喝各祇候次舍人通館伴使副某甲以下常起居次通契丹使其甲常起居次通副使其甲常起居俱引赴西面立次通宰臣以下橫行通某甲以下應喏奏聖躬萬福喝各就坐應喏兩拜呼萬歲分升殿東西向立次通事舍人引契丹舍利以下次差來通事從人

俱分班入當殿兩拜奏聖躬萬福喝各就坐兩拜呼  
萬歲分引赴兩廊立次通教坊使看盞及進茶床醉  
酒并閣門奏進酒並如長春宴日之儀酒五巡起宰  
臣以下降階班立兩拜揖笏舞蹈三拜喝各祇候宰  
臣以下并三司使文明殿學士樞密直學士升殿侍  
立其餘臣僚并契丹使並出次引舍利及差來從人  
俱兩拜萬歲訖分班引出如傳宣賜茶酒更喝謝拜  
如前儀已上班絕舍人再引契丹使人西面揖躬舍  
人當殿通北朝國信使某祇候辭通訖引當殿兩拜  
出班致辭歸位又兩拜訖宣有敕賜跪受拜舞訖喝

好去遂引出次引副使致詞受賜拜舞如前儀亦出  
次引舍利已下次引差來通事從人俱分班入舍人  
喝有敕賜衣服衣着銀器分物各應喏跪受候擡擔  
床絕就拜起又兩拜萬歲喝好去分班引出其使副  
各服所賜再引入當殿兩拜萬歲訖喝祇候引升殿  
當御前立皇帝宣閣門使授旨傳語國主舍人揖國  
信使跪閣門使傳旨通譯訖揖國信使起立閣門使  
御前摺笏於內侍都知處捧授書匣舍人揖國信使  
跪閣門使跪分付訖揖起下殿西出政和詳定五禮  
有紫宸殿大遼使朝見儀紫宸殿正旦宴大遼使儀

紫宸殿大遼使朝辭儀崇政殿假日大遼使朝見儀  
崇政殿假日大遼使朝辭儀其紫宸殿赴宴遼使副  
位御坐西諸位上將軍之南夏使副在東朵殿並西  
向北上高麗交趾使副在西朵殿並東向北上遼使  
舍利從人各在其南夏使從人在東廊舍利之南諸  
蕃使副首領高麗交趾從人溪峒衙內指揮使在西  
廊舍利之南又至各就位有分引兩廊班首詣御坐  
進酒樂作贊各賜酒群官俱再拜就坐酒五行皆作  
樂賜華皇帝再坐赴宴官行謝華之禮

夏國進奉使見辭儀夏國歲以正旦聖節入貢元豐

八年使來詔夏國見辭儀制依嘉祐八年見于皇儀  
殿門外朝辭詣垂拱殿政和新儀夏使見日俟見班  
絕謝班前使奉表函引入殿庭副使隨入西向立舍  
人揖躬舍人當殿躬奏夏國進奉使姓名以下祇候  
見引當殿前跪進表函舍人受之副入內侍省官進  
呈使者起歸位四拜起居舍人宣有敕賜某物兼賜  
酒饌跪授箱過俛伏興再拜舍人曰各祇候揖西出  
次從人入不奏即引當殿四拜起居舍人宣賜分物  
兼賜酒食跪授箱過俛伏興再拜舍人曰各祇候揖  
西出辭日引使副入殿庭西向立舍人揖躬舍人當

毅躬奏夏國進奉使姓名以下祇候辭引當殿四拜  
宣賜某物酒饌再拜如見儀凡蕃使見辭同日者先  
夏國次高麗次交趾次海外蕃客次諸蠻

高麗進奉使見辭儀見日使捧表函引入殿庭副使  
隨入西向立舍人鞠躬當殿前通高麗國進奉使姓  
名以下祇候見引當殿使稍前跪進表函俛伏興訖  
歸位大起居班首出班躬謝起居歸位再拜又出班  
謝面天顏沿路館券都城門外茶酒歸位再拜揖笏  
舞蹈俛伏興再拜舍人宣有敕賜某物兼賜酒食揖  
笏跪授箱過俛伏興再拜舍人曰各祇候揖西出次

押物以下入不通即引當殿四拜起居宣有敕賜某  
物兼賜酒食跪授箱過俛伏興再拜起居舍人曰各  
祇候揖西出辭日引使副入殿庭西向立舍人揖躬  
舍人當殿躬通高麗進奉使姓名以下祇候辭引當  
殿四拜起居班首出班致詞歸位再拜舍人宣有敕  
賜某物兼賜酒食摺笏跪授箱過俛伏興再拜舍人  
曰好去揖西出次從人入辭如見政和元年詔高麗  
在西北二國之間自今可依熙寧十年指揮隸樞密  
院明年入貢詔復用熙寧例以文臣充接伴使副仍  
往還許上殿七年賜以籩豆各十二簠簋各四登一

鋗二鼎二罍洗一尊二銘曰惟爾令德孝恭世稱東  
蕃有來顯相予一人嘉之用錫爾寶尊以寧爾祖考  
子子孫孫其永保之紹興二年高麗遣使副來貢並  
賜酒食于同文館

金國聘使見辭儀宣和元年金使李善慶等來遣直  
秘閣趙有開偕善慶等報聘已而金使復至用新羅  
使人禮引見宣政殿徽宗臨軒受使者書自後屢遣  
使來帝待之甚厚時引上殿奏事賜予不貲禮遇並  
用契丹故事紹興三年十二月宰臣進呈金使李永  
壽等正旦入見故事百官俱入上曰全盛之時神京

會同朝廷之尊百官之富所以夸示今暫駐於此事從簡便舊日禮數豈可盡行無庸俱入使人見辭並賜食于殿門外八年金國遣使副來就驛議和詔王倫就驛賜宴十一年十一月金國遣審議使來入見時殿陛之儀議猶未決議者謂兵衛單弱則非所以隆國體欲設仗衛恐駭虜情乃設黃麾仗千五百人于殿廊蔽以帝幙班定徽惟十二年扈從徽宗梓宮皇太后使副來十三年十一月有司言賀正旦使初至於盱眙軍賜宴未審回程合與不合筵待詔內侍省差使臣二員沿路賜御筵一員於平江府一員於鎮

江府一員於盱眙軍尋詔金國賀正旦人使到闕赴宴等坐次令與宰臣相對稍南使副上下馬於執政官上下馬處三節人從並於宮門外上下馬立班則於西班牙宰臣相對立仍權移西班牙相在東壁宰臣之東十四年正月一日宴金國人使于紫宸殿文臣權侍郎已上武臣刺史已上赴坐自後正旦賜宴倣此五月金國始遣賀天申節使來有司言合照舊例北使賀生辰聖節使副隨宰臣紫宸殿上壽進壽酒畢皇帝宰臣以下同使副酒三行教坊作樂三節人從不赴既而三節人從有請乞隨班上壽詔許之

仍賜酒食遇賀正人使朝辭在上辛祠官致齋之內  
仍用樂二十九年以皇太后崩其賀正使副止就驛  
賜宴見辭日賜茶酒並不舉樂大率止使至闕先遣  
伴使賜御筵于班荆館在赤岸去府五十里酒七行翌日登舟  
至北郭稅亭茶酒畢二馬入餘杭門至都亭驛賜袞  
被鈔鑼等明日臨安府書送酒食閣門官入位具朝  
見儀投朝見榜子又明日入見伴使至南宮門外下  
馬止使至隔門內下馬皇帝御紫宸殿六參官起居  
止使見畢退赴客省茶酒遂宴垂拱殿酒五行惟從  
官已上預坐是日賜茶器名果又明日賜生餗見之

二日與伴使偕往天竺燒香上賜沉香乳糖齋筵酒  
果次至冷泉亭呼猿洞而歸翌日賜內中酒果風藥  
花餳赴守歲夜筵酒五行用傀儡正月朔旦朝賀禮  
畢上遣大臣就驛賜御筵中使傳旨宣勸酒九行三  
日客省簽賜酒食內中賜酒果遂赴浙江亭觀潮酒  
七行四日赴玉津園燕射命諸校善射者假管軍觀  
察使伴之上賜弓矢酒行樂作伴射官與大使並射  
弓館伴副使並射弩酒九行退五日大宴集英殿尚  
書郎監察御史已上皆預學士撰致語六日朝辭退  
賜襲衣金帶大銀器臨安府書送贍儀復遣執政官

就驛賜宴晚赴解換夜筵伴使與北使皆親勸酬且以衣物為侑次日加賜龍鳳茶金鍍合乘馬出北闕門登舟宿赤岸又次日復遣近臣押賜御筵自到闕朝見射射朝辭共賜大使金千四百兩副使金八百八十兩衣各三襲金帶各三條都管上節各賜銀四十兩中下節各三十兩衣一襲塗金帶一條使人到闕筵宴凡用樂人三百人百戲軍七十人築毬軍三十二人起立毬門行人三十二人旗鼓四十人並下臨安府差相撲一十五人於御前等子內差並前期教習之

諸國朝貢其交州宜州黎州諸國見辭並如上儀惟  
迓勞宴賚之數則有殺焉其授書皆令有司付之又  
有西蕃唃氏西南諸蕃占城回鶻大食于闐三佛齊  
邛部川蠻及溪峒之屬或比間數歲入貢層檀日本  
大理注輦蒲甘龜茲佛泥拂菻真臘羅駁勒泥邈黎  
闍婆甘眉流諸國入貢或一再或三四不常至注輦  
三佛齊使者至以真珠龍腦金蓮花等登陸跪散之  
謂之撒毘元祐二年知潁昌府韓頴言交趾小國其  
使人將及境臣嘗近弼難以抗禮按元豐中迓以兵  
官餞以通判使副詣府其犒設令兵官主之請如故

事仍詔所過郡凡前宰相執政官知判者亦如之又詔立回賜于闐國信分物法歲遣貢使雖多止一加則又命于闐國使以表章至則間歲聽一入貢餘令於熙秦州貿易禮部言元豐著令西南五姓蕃每五年許一貢今西蕃秦平軍入貢期限未及詔特許之學士院言諸蕃初入貢者請令安撫鈐轄轉運等司體問其國所在遠近大小與見今入貢何國為比保明聞奏庶待遇之禮不致失當宣和詔蕃國入貢令本路驗實保明如涉詐偽以上書詐不實論建炎三年占城國王遣使進貢適遇大禮遂加恩特授檢校

少傳加食邑自後明堂郊祀並倣此紹興二年占城  
國王遣使貢沉香犀象玳瑁等答以綾錦銀絹建炎  
四年南平王薨差廣南西路轉運副使尹東珣充弔  
祭使賜絹布各五百疋羊酒寓錢寓金銀等就  
欽州授其國迎接人制贈侍中進封南越王封其子  
為交趾郡王遇大禮並加恩如占城國王淳熙元年  
賜安南國王印銅鑄塗以金紹興七年三佛齊國乞  
進章奏赴闕朝見詔許之令廣東經略司斟量只許  
四十人到闕進貢南珠象齒龍涎珊瑚琉璃香藥詔  
補保順慕化大將軍三佛齊國王給賜鞍馬衣帶銀

器賜使人宴于懷遠驛淳熙五年再入貢計其直二萬五千緡回賜綾錦羅絹等物銀二千五百兩紹興三十一年正月安南獻馴象帝曰蠻夷貢方物乃其職但朕不欲以異獸勞遠人其令帥臣告諭自今不必以馴象入貢三十二年孝宗登極詔曰比年以來累有外國入貢太上皇帝冲謙弗受况朕涼菲又何以堪自今諸國有欲朝貢者令所在州軍以理諭遣毋得以聞淳祐三年安南國主陳日叟來貢加賜功臣號十一年再來貢景定三年六月日叟上表貢獻乞授其位於其子陳威冕咸淳元年二月加安南大國

王陳日巽功臣增安善二字安南國王陳威晃功臣  
增守義二字各賜金帶鞍馬衣服二年復上表進貢  
禮物賜金五百兩賜帛一百匹降詔嘉獎

志卷第七十二

字六十个

卷之三

三

文

志卷第七十三

宋史一百二十

開府儀同三司上贊錄鑾國書事前書奏丞相監修國史領經筵事都總裁晚殿等奉

勅修

禮二十三 賓禮五 附錄

羣臣上表儀  
朝省集議班位

宰臣赴上儀  
臣僚上馬之制

臣僚呵引之制

群臣上表儀通禮守官設次于朝堂文東武西相對為首設中書令位于群臣之北禮曹掾舉表案入引中書令出就南面立禮部郎中取表授中書令令即受表入奏其禮凡正至不受朝及邦國大慶瑞上尊

號請舉行大禮宰相率文武群臣暨諸軍將校番夷  
酋長道釋耆老等詣東上閣門拜表知表官跪授表  
於宰臣宰臣跪授於閣門使乃由通進司奏御凡有  
答詔亦拜受於閣門獲可奏者奉表稱賀其正至樞  
密使率內班拜表長春殿門外亦閣門使受之又西  
京留守拜表儀制留司百官每五日一上表起居質  
明並集長壽寺立班置表于案再拜以遣其春秋賜  
服及大慶瑞並如之或令分司官齋詣行在或止驛  
付南京留司約用此制若巡幸東京則留司百官亦  
五日一上表起居並集大相國寺其制群臣詣閣拜

奏者首云文武百僚具官臣某等言常奏御者止云  
臣某言並稱尊號已有功臣爵邑者具之狀奏者前  
後列衛不稱尊號亦云功臣爵邑其外又有書疏奏  
劄榜子之類乾德二年令有司詳定表首太常禮儀  
院言僕射兩省官品第二太子三師官品第一品位  
雖高而南省上臺為尊合以僕射充首若專以品秩  
為定則諸行侍郎品第四列於諸司三品卿監之上  
不可以品序為準按唐貞元六年詔每有慶賀及諸  
臣上表並合上公為首如三公闕以令僕射之中書  
門下列貢章表則僕射是百僚師長難同官僚之例

詔百官集議翰林學士陶穀等曰按唐制上臺東宮  
並是廷臣當時左右僕射侍中中書令為正宰相貞  
觀末帶同中書門下三品者方為宰相今僕射既非  
宰相合在太子三師之下理固不疑若以官僚非廷  
臣即宰相豈當無領今若先二品而後一品升後列  
而退前班紊其等威事恐非順請以太子三師為表  
首竇儀等曰東宮三師為表首論討故典實皆無據  
左僕射當為表首者其事有六按六典尚書為百官  
之本今自一品至六品常參官皆以尚書省官為首  
則僕射合為表首一也又唐制上表無上公即尚書

令僕以下行之其嗣王合隨宗正若有班位合依王  
品則嗣王雖一品不得為表首二也僕射位次三公  
合為表首三也况僕射為百僚師長東宮三師非師  
長之任四也晉天福中詔謝賀上表上公行之如闕  
即令僕射行之五也立制之班卑者先入後出尊者  
後入先出今東宮一品立定僕射乃入僕射既退東  
宮一品乃出且在兩省之後六也詔從儀等議以僕  
射為表首焉

宰臣赴上儀開元禮有任官初上相見之儀宋制凡  
牧守赴上多仍州府舊禮臺省之制宰相親王使相

正衙謝訖出文德殿便門至西廊堂後官兩省雜事迎參至中書便門兩省官迎班升都堂與送上官對揖見任侍中中書平章事者降階又與送上官對拜訖分東西升坐于牀兩省雜事讀案堂後官接案摺笏頂筆判署凡三道一司天監壽星見二開封府嘉禾合穗三澶州黃河清並判準始謝送上官訖三司使學士兩省官待制三司使副升堂展賀百官先班中書門外上事官降階百官入直省官通班贊致賀歸後堂與參知政事樞密副使宣徽使相見會食訖退建隆三年中書門下言準唐天成元年詔故事藩鎮帶平章

事合於都堂視事刊石以記官族輸禮錢三千貫近  
年頗隳曩制自今藩鎮帶平章事者輸禮錢五百千  
刻石記歲月其錢以給兩省公用望舉行之詔自今  
宰相及樞密使兼平章事侍中中書令者輸禮錢三  
百千藩鎮五百千刻石以記如舊制增秩者不再輸  
舊相復入者輸如其數乾德二年置參知政事就宣  
徽院赴上而樞密使副止上事于本廳後以曹彬兼  
侍中為樞密使特令赴中書上事大中祥符中詔自  
今宰相官至僕射者並于中書都堂赴上不帶平章  
事亦令赴上有司上儀注宰相用常儀僕射本省上

日郎中員外班迎于都堂門內尚書丞郎于東廊階上稍近班迎揖金吾將軍升階展拜賀禮生贊引主事讀案見任中書樞密使相前任中書門下並不赴餘如宰相之儀上訖與本省御史臺四品兩省五品諸司三品以上會食右僕射王旦充玉清昭應宮使有司按故事宰相凡有吉慶百官皆班賀詔以未葺攸司其班賀權罷旦赴上修宮所特賜會丞郎三司副使以上悉預自是宮觀使副上日皆賜會作樂天禧初太保平章事王旦為太尉國朝以來三公不兼宰相無赴上儀特詔有司詳定就尚書省赴上百官

班迎宰相而下悉集御史大夫中丞知雜三院御史  
皆僚屬送上判案三道中丞以上即京府尹赤縣令  
諸曹節度刺史皇城宮苑使悉集翰林學士入院日  
賜設惟學士中書舍人赴坐又資政侍讀侍講龍圖  
閣學士直學士兼秘書監並赴上秘閣及兩省五品  
以上任三館學士判館修撰者皆賜設焉

朝省集議前代不載其儀宋初刑政典禮之事當集  
議者先下詔都省省吏以告當議之官悉集都堂設  
左右丞于堂之東北南向御史中丞于堂之西北南  
向尚書侍郎于堂東廂西向兩省侍郎常侍給事諫

舍于堂之西廂東向知名表郎官于堂之東南北向監議御史于堂之西南北向又設左右司郎中員外于左右丞之後三院御史于中丞之後郎中員外于尚書侍郎之後起居司諫正言于諫舍之後如有僕射御史大夫即于左右丞中丞之前如更有他官即諸司三品于侍郎之南東宮一品于尚書之前武班二品於諫舍之南皆重行異位卑者先就席左右丞升廳省吏抗聲揖群官就坐知名表郎官以所議事授所司奉詣左右丞執卷讀訖授中丞中丞授于尚書侍郎以次讀訖復授知名表郎官將畢左

右丞奉筆叩頭揖群官以一副紙書所議事節署字于下授四坐監議御史命吏告云所見不同者請不署字以官高者為表首如止集本省官坐如常儀其知名表郎官監議御史坐仍北向惟僕射以上得乘馬至都堂他官雖同平章事亦止屏外明道二年尚書議莊獻莊懿太后升祔省官帶內外制兼三司副使承例移文不赴監議御史段少連以為官帶近職一時之選宜有建明不當反自高異乃奏議事不集以違制論從之集賢校理趙良規言國朝政事令敕儀制別有學士知制誥侍制三司副使著位視品與

前朝異固無在朝叙職入省叙官之說若全不論職則後行員外郎兼學士在朝立丞郎上入省居比駕下知制誥待制入朝與待制同列入省分廁散郎員外郎任三司副使郎中任判官在三司為參佐入本省為正員所以舊來議事集尚書省官帶職者不赴別詔三省悉集則及大小兩省內朝官悉集則及學士待制三司副使更集他官則諸司三品武官二品各以本司長官故事尚書省官帶知制誥中書省奏班簿是于尚書省御史臺了不著籍故有絕曹之語又凡定學士舍人兩省著位除先後入外若有升降

皆特稟朝旨豈有在朝入省送為高下御史臺禮院  
詳定久不決判禮院馮元等曰會議之文由來非一  
或出朝廷別旨或循官司舊規故集本省者即南省  
官集學士兩省臺官者容有兩制給舍中丞集學士  
臺省及諸司四品以上者容有卿監集文武百官者  
容有諸衛蓋謀事有小大集官有等差率繫詔文乃  
該餘職少連以太常易名之細考功覆議之常誤謂  
群司普當會席列為具奏嬰以嚴科遂使絕曹清列  
還入本行分局常員略無異等請臣僚擬謚止集南  
省官屬或事緣體大臨時敕判兼召三省臺寺即依

舊例御史臺言今尚書省官任兩制者係臺省之籍無坐曹之實論職官之言正為絕曹者設豈可受祿則繫官定奉議事則絕曹為辭况王旦王化基趙安仁晁迥杜鎬楊億皆嘗預議於尚書省故相李昉為主客郎中知制誥日屢經都省議事又議大事僕射御史大夫入省唯僕射至廳下馬于今行之所以重本省也故都堂會議列狀以品就坐以官忽此更張恐非通理禮官吳育曰兩省各有未安尚書省制度雖崇亦天子之有司在朝廷既殊班列入有司輒易尊卑是以朝省為彼我官職分二事也兩制近職若

有事議而去絕班不赴非所以求至當且知制誥中書省奏班簿是謂絕班翰林學士亦知制誥不絕班簿此因循之制非確據也縱絕班有例而絕官無聞一人命書三省連判而都無所繫止為奉錢豈命官之禮今取典故中最明一事足以質定祥符五年僕射上事議絕班之官別頭贊引不與本省官同在迎班請凡會議省官帶近職者別作一行而坐自為序別非以相暨若招兩制臺省諸司諸衛官畢集則各從其類自作一行書議如其位次詔尚書省議事應帶職官三司副使以上並不赴如遇集議大事令赴

別設坐次是歲紫宸垂拱殿刊石為百官表位三司  
使內朝班學士右獨立石位門外亦班其上  
熙寧二年御史臺太常禮院詳定臣僚御路上馬之  
制近上臣僚及止使到闕並于御路上行馬中書樞  
密院執政官宣徽院御史中丞知雜御史左右金吾  
攝事官清道者導從呵止依舊式其三司副使以上  
亦許出節正任觀察使以上與合出節臣僚並許自  
宣德門外至天漢橋北御路上行馬如從駕出入及  
宗室內庭諸宮院車騎並不在此限御史臺又言舊  
制百官臺參辭謝臣僚于朝堂先赴三院御史幕次

又赴中丞幕次得以體按老疾今止于御史廳一員  
對拜不惟有失舊儀無恐不能公共參驗請如舊制  
朝堂拜揖遇放常朝即詣御史臺已而詔宰臣親王  
使相兩府宣徽使遇入樞密院門許至從南第二門  
外上下馬又詔宰臣上馬樞密院次之諸司又次之  
左右丞上下馬處並同兩省侍郎御史臺言左丞蒲  
宗孟右丞王安禮賀僕射上尚書省于都堂下馬按  
左右丞上下馬于本廳請付有司推治安禮爭論上  
前以為今日置左右丞為執政官不應有厚薄左右  
丞于都堂上下馬自此始尋詔執政官退朝上馬宰

臣于樞密院餘於隔門外都堂聚議退左丞于門下侍郎廳右丞于中書侍郎廳品官詣尚書省上下馬依雜壓太中大夫以上就第一貯廊監察御史以上就過道諸六曹尚書侍郎即太中大夫以上就本廳監察御史以上就客位餘並過道門外政和朝參臣僚上馬次序俟皇城門開樞密入次三省執政官次一品二品文臣六曹侍郎殿中監開封尹大司成侍從官兩省次百官御史臺編欄以次入其宰相罷政韓琦以司徒節度判相州曾公亮以司空節度為集禧觀使王安石以觀文殿大學士吏部尚書知江寧

府曹佾以中書令節度充景靈宮使韓絳以觀文殿大學士吏部侍郎知大名府致仕太師文彥博來朝其大朝會班位儀物如之吳育以觀文殿大學士吏部尚書為西太一宮使大朝會綴中書門下班而已自是舊相按例重輕以特旨行之

治平四年御史臺言慶曆中有詔詳定武臣出節呵引之制節度使在尚書下三節節度觀察留後在諸行侍郎下兩節觀察使在中書舍人下諸衛大將軍防禦團練使在大卿監下內客省使比諸司大卿景德使比將作監引進使比庶子在防禦使下以上

各二節諸州刺史諸衛將軍在少卿監下宣慶四方  
館使比少卿宣政昭宣閤門使比司天監少監諸衛  
將軍上皇城使以下諸司使比郎中客省引進閤門  
副使比員外郎樞密都承旨在司天少監下閤門使  
上副都承旨在閤門使下樞密副承旨諸房副承旨  
在諸司使下以上並兩人呵引當時已施行矣而皇  
祐編敕刪去此制請復舉行

志卷第七十三

卷之三  
上柱國錄軍事前軍司丞相醫官國史領經筵事都總裁臣脫脫等奉  
敕修

禮二十四 軍禮

禡祭

閱武

受降

獻俘

打毬

日伐鼓

禡師祭也宜居軍禮之首講武次之受降獻俘又次之田獵以下亦各以類附焉軍前大旗曰牙師出必祭謂之禡後魏出師又建纛頭旗上太宗征河東出京前一日遣右贊善大夫潘慎修出郊用少牢一祭蚩尤禡牙遣著作佐郎李巨源即北郊望氣壇用香柳枝燈油乳粥酥蜜餅果

祭北方天王咸平中詔太常禮院定禫儀所司除地爲壇  
兩壇繞以青繩張幄帝置軍牙六纛位版版方七寸厚三  
分祭用剛日具饌牲用太牢以羊豕代其幣長一丈八尺  
軍牙以白六纛以皂都部署初獻副都部署亞獻部署三  
獻皆戎服清齋一宿將校陪位禮畢焚幣釁鼓以一牢又  
擇日祭馬祖馬社

閱武仍前代制太祖太宗征伐四方親講武事故不盡用  
定儀亦不常其處鑿講武池朱明門外以習水戰復築講  
武臺城西楊村秋九月大閱與從臣登臺觀焉真宗詔有  
司擇地含輝門外之東武村爲廣場馮高爲臺臺上設屋

構行宮其夜三鼓殿前侍衛馬步諸軍分出諸門詰旦帝乘馬從官並戎服賜以窄袍至行宮諸軍陣臺前左右相向步騎交屬亘二十里諸班衛士翼從于後有司奏成列帝升臺東向御戎帳召從臣坐觀之殿前都指揮使王超執五方旗以節進退又於兩陣中起候臺相望使人執旗如臺上之數以相應初舉黃旗諸軍旅拜舉赤旗則騎進舉青旗則步進每旗動則鼓驅士謠聲震百里外皆三挑乃退次舉白旗諸軍復再拜呼萬歲有司奏陣堅而整士勇而厲欲再舉詔止之遂舉黑旗以振旅軍於左者略右陣以還由臺前出西北隅軍於右者略左陣以還由臺前

出西南隅並凱旋以退乃召從臣宴教坊奏樂回御東華門閱諸軍還營鈞容奏樂於樓下復召從臣坐賜飲明日又賜近臣飲於中書諸軍將校飲於營中內職飲於軍器庫諸班衛士飲於殿門外神宗閱左藏庫副使升斌所教牌手於崇政殿乃命殿前步軍司擇驍健者依法教習自是營屯及更戍諸軍畿甸三路民兵皆隨伎藝召見親閱焉凡閱試禁衛戍軍民兵總率第其精彊賜以金帛而超等高者至命爲吏選官其典領者優加職秩涇原經略蔡挺肄習諸將軍馬點閱周悉隊伍有法入爲樞密副使因言於上而引試之舊以七軍營陣校試而分數不齊前後

抵牾命校試官采掇定為八軍法及軍法成頒行諸路既  
又定九軍法以一軍營陣即城南好草陂閱之皆有賞賚  
其按閱砲場連弩及便坐日閱召募新軍時令習戰如故  
事建炎三年六月高宗諭輔臣曰朕欲親閱武宰臣呂頤  
浩曰方右武之時理當如此祖宗時不忘武備如鑿金明  
池益欲習水戰張浚曰祖宗每上已游幸必命衛士馳射  
因而激賞亦所以講武也帝曰朕非久命諸將各閱所部  
人馬當召卿等共觀足以知諸將能否後以廵幸不果行  
紹興五年正月始御射殿閱諸班直殿前司諸軍指教使  
臣親從宿衛親兵并提轄部押親兵使臣射射共一千二

百六十人每六十人作一撥遂詔戶部支金千兩付樞密院激賞庫充犒用三月御射殿閣等子趙青等五十人角力轉資支賜錢銀有差八月御射殿閣廣東路經略司解發到韶州士庶子弟陳裕試神臂弓特補進武校尉賜紫羅窄衫銀束帶差充本路經略司指使十四年十一月閱殿前馬步軍將士藝精者賞有差自是歲以冬月行之號曰冬教三十年十月御射殿引三衙統制同統制統領同統領入內射射詔餘合赴內殿教人依年例支降例物令逐司自行按試等第給散舊例每歲引三衙官兵教是日止引統制統領故有是詔三十二年四月二十五日御射殿隔門特坐引呈新舊行門

射射乾道二年十一月辛候潮門外大教場次幸白石教  
場應從駕臣僚自祥曦殿並戎服起居從駕徃回內管軍  
御帶環衛官從駕宰執以下免從就逐幕次賜食俟進晚  
膳畢免奏萬福并免茶從駕還內二十四日辛候潮門外  
大教場進早饍次幸白石教場閱兵三衙率將佐等導駕  
詣白石皇帝登臺三衙統制統領官等起居畢舉黃旗諸  
軍皆三呼萬歲拜訖三衙管軍奏報取旨馬軍上馬打圍  
教場舉白旗三司馬軍首尾相接舉紅旗向臺合圍聽一  
金止軍馬各就圍地作圓形排立射生官兵隨鼓聲出馬  
射獐兔一金止疊金射生官兵各歸陣隊舉黃旗射生官

兵就御臺下獻所獲帝遂慰勞賜賚諸將鞍馬金帶以及士卒諸軍懽騰鼓舞就列百姓觀者如山時久陰曠暨帝出郊雲霧解駁風日開霽帝遣諭主管殿前司王琪等曰前日之教師律整嚴人無譁囂分合應度朕甚悅之皆卿等力也琪等曰此陛下神武之化六軍恭謹所致臣願得以此爲陛下勦絕姦宄四年十月殿前司言相視龍王堂北江岸以東茅灘一帶平地可作教場已修築將壇將來三司馬步軍並各全裝披帶衣甲執色器械至日先赴教場下營排辦俟駕登臺聽金鼓起居畢依資次變陣教閱所有聖駕出郊除禁衛外欲於本司入陣馬軍內摘差護

聖馬軍八百人騎弓箭器械作十六隊於儀衛前後引從各分八隊隊各五十人往回沿路各奏隨軍鼓笛大樂及摘差本司入教陣隊內諸軍步親隨一千人并統領將官三員至日先赴將臺下各分左右於後壁周圍留空地三十步以容禁衛外作三重環立十六日車駕至灘上諸軍人馬前一日於教場東列幕宿營是日三衙管軍與各軍統領將佐導駕乘馬至護聖步軍大教場亭更御甲冑至上皇帝登臺三衙起居畢權主管殿前司王達奏三司人馬齊舉黃旗諸軍呼拜者三達奏請從頭教中軍鳴角倒門角旗出營馬步軍簇隊成收鼓訖連三鼓馬軍上馬

步人撮起旗槍四鼓舉白旗中軍鼓聲旗應變方陣爲備  
敵之形別高一鼓步軍四向作禦敵之勢且戰且前馬軍  
出陣作戰鬪之勢別高一鼓各分歸地分五鼓舉黃旗變  
圓陣爲自環內固之形如前節次訖三鼓舉赤旗變銳陣  
諸軍相屬魚貫斜列前利後張爲衝敵之形亦依前節次  
訖王達奏人馬教絕取旨舉青旗變放教直陣收鼓訖一  
金止重鼓三馬軍下馬步人齷落旗槍皆應規矩帝大悅  
犒賞倍之士卒歡呼謝恩如儀鳴角聲簇隊訖放教拽隊  
步人分東西引拽馬軍交頭於御臺下隨隊呈試驍銳大  
刀武藝繼而進呈車砲火砲煙槍及赭山打圍射生馬步

軍統制官蕭鷗已以所獲獐鹿等就御臺下進獻人馬拽  
絕皇帝復御常服乘馬至車子院宣喚殿前司撥發官馬  
定遠侯彥昌各賜馬一匹彥昌仍自準備將特升副將進  
御酒上謂王達曰今日教閱進止分合軍律整肅皆卿之  
力也達奏陛下神武四海共知六師軍容孰敢不肅時賜  
酒俱以十分達奏以軍馬事不敢飲帝曰少飲之親減太  
半飲畢謝恩退又宣問主管侍衛馬軍司李舜舉今日按  
閱之兵比向時所用之師何如舜舉奏曰今日所治之兵  
皆陛下平時躬親訓練撫以深恩賜之重賞忠勇百倍非  
昔日可比其儀皇帝至祥曠殷行門禁衛等並戎服迎駕常起居皇帝至知閣門官以下並戎服常起居

訖皇帝乘馬出從駕官從駕至候潮門外大教場御幄殿  
下馬入幄更衣訖皇帝被金甲出幄行門禁衛等迎駕奏  
萬福皇帝乘馬至教場臺下馬升臺入幄從駕官宰執親  
王使相正任知閣御帶環衛官升臺於幄殿分東西相向  
立管軍並令全裝衣甲帶御器械執骨朵升臺於幄殿指  
南面西立俟入內官喝排立皇帝出幄行門禁衛等迎駕  
奏萬福皇帝出閭門分引殿前馬步三司統制統領官常  
起居訖次三司將佐以下聽鼓聲常起居次殿帥執骨朵  
教閱畢再赴御坐前奏教銳陣俟教閱畢再赴御坐前奏教  
教閱畢再赴御坐前奏教銳陣俟教閱畢再赴御坐前奏教  
訖轉與撥發官引三司統制統領將佐再拜謝恩訖各歸  
本軍皇帝起入幄更衣訖皇帝出幄皇帝坐舍人引宰執  
鑿後立俟進御茶床舍人贊就坐宰執躬身應喏訖直身  
立就坐進第一盞酒起立鑿後俟皇帝飲酒訖舍人贊就  
坐躬身應喏訖直身立俟宰執酒至接盞飲酒訖蓋付殿  
侍次舍人贊食並如儀至第四盞傳旨宣勸訖御藥傳旨  
不拜舍人承旨贊不拜贊就坐第五盞宣勸如第四盞儀  
酒食畢舉御茶床舍人分引宰執躬身贊不拜各祗候直身  
立

降踏道歸幕次皇帝起乘馬至車子院下馬皇帝出幄至  
車子院門樓上出賜親王酒再拜謝訖次賜使相正任并  
管軍知閣御帶環衛官酒訖逐班再拜謝訖依舊向立次  
親王執盞進皇帝酒皇帝飲酒訖一班再拜謝訖俟皇帝  
觀畢起降車子院門樓歸幄親王以下退皇帝乘馬出車  
子院門行門禁衛等迎駕奏萬福皇帝乘馬至候潮門外  
大教場應從駕官並戎服乘馬從駕回皇帝乘馬入和寧門至祥曇殿上下馬還宮餘倣此淳熙四年十二月大閱于茅灘十年十一月大閱于龍山十六年十二月幸候潮門外教場大閱端平二年四月大閱以時暑不及行

受降獻俘太祖平蜀孟昶降詔有司約前代儀制爲受降

禮昶至前一日設御坐仗衛于崇元殿如元會儀至日大  
陳馬步諸軍于天街左右設昶及其官屬素案席褥于明  
德門外表案于橫街北通事舍人引昶及其官屬素服紗  
帽北向序立昶跪奉表授閣門使復位待命表至御前侍  
臣讀訖閣門使承旨出昶等俯伏通事舍人掖昶起官屬  
亦起宣制釋罪昶等再拜呼萬歲衣庫使導所賜襲衣冠  
帶陳於前昶等又再拜跪受改服乘馬至昇龍門下馬官  
屬至啓運門下馬就次帝常服升坐百官先入起居班立  
閭門使引昶等入舞蹈拜謝召昶升殿閣門使引自東階  
升宣撫使承旨安撫之昶至御坐前躬承問訖還位與官

屬舞蹈出中書率百官稱賀遂宴近臣及昶于大明殿嶺  
南平劉鋹就擒詔有司撰獻俘禮鋹至上御明德門列仗  
衛諸軍百官常服班樓前別設獻俘位于東西街之南北  
向其將校位於獻俘位前北上西向有司率武士係鋹等  
白練露布前引至太廟西南門鋹等並下馬入南神門北  
向西上立監將校官次南立俟告禮畢於西南門出乘馬  
押至太社如上儀乃押至樓南御路之西下馬立俟獻俘  
將校戎服帶刀攝侍中版奏中嚴百官班定版奏外辦帝  
常服御坐百官舞蹈起居畢通事舍人引鋹就獻俘位將  
校等詣樓前舞蹈訖次引露布案詣樓前北向宣付中書

門下如宣制儀通事舍人跪受露布轉授中書門下轉授  
攝兵部尚書次攝刑部尚書詣樓前跪奏以所獻俘付有  
司上召銀誥責銀伏地待罪詔誅其臣龔澄樞等特釋銀  
縛與其弟保興等罪仍賜襲衣冠帶韁笏器幣鞍馬各服  
其服列謝樓下百官稱賀畢放仗如儀南唐平帝御明德  
門露布引李煜及其子弟官屬素服待罪初有司請如獻  
劉鋹帝以煜奉正朔非若鋹拒命寢露布弗宣遣閭門使  
承制釋之太宗征太原劉繼元降帝幸城北陳兵衛張樂  
宴從臣于城臺繼元帥官屬素服臺下遣閭門使宣制釋  
罪召繼元親勞之從臣詣行宮稱賀時以在軍中故不備

禮繼元至京師詔告獻太廟前一日所司陳設如常告廟  
儀告日黎明博士引太尉就位通事舍人引繼元西階下  
東向立其官屬重行立贊者贊太尉再拜訖博士引就盥  
爵如常儀詣東階解劍脫舄升第一室進奠再拜太祝跪  
讀祝文訖又再拜通事舍人引繼元及官屬詣室前西階  
下北向立舍人贊云皇帝親征收復河東僞主劉繼元及  
僞命官見贊者曰再拜拜訖退位次至第二第三第四第  
五室皆如第一室博士引太尉降階佩劍納履復位贊者  
曰再拜太尉與繼元等皆再拜退焚祝版於齋坊繼元既  
命以官故不稱俘焉元符二年西蕃王龍授邈川首領瞎

征等降詔具儀注以受降日御宣德門設諸班直上四軍  
仗衛諸軍素服陳列降者各服蕃服以見審問訖有旨放  
罪各等第賜首服袍帶百官稱賀而再御紫宸殿賜宴會  
哲宗崩樞密院留龍檢等西京聽旨詔罷御樓立仗但引  
見于後殿龍檢一班契丹公主一班夏國回鶻公主次之  
黠征一班邊廝波結并族屬次之應族屬首領各從其長  
以次起居僧尼公主皆蕃服蕃拜並賜冠服謝訖賜酒饌  
橫門外政和初議禮局上受降儀皇帝乘輿升宣德門樓  
降輿坐御幄百官與降王蕃官各班樓下如大禮肆赦儀  
東上閣門以紅條袋班齊牌引升樓樓上東上閣門官附

內侍承旨索扇扇合帝即御坐簾卷內侍又贊扇開侍衛  
如常儀諸班親從并裏園降王人等迎駕自贊常起居次  
舍人贊執儀將士常起居次管幹降王使臣并隨行舊蕃  
官常起居次禮直官舍人引百官橫行北向贊者曰拜在  
位官皆再拜舞蹈三稱萬歲又再拜班首奏聖躬萬福又  
再拜退百官各就東西位舍人引降王服本國衣冠詣樓  
前北向女婦少西立僧又少西尼立於後入內省官詣御  
坐前承旨傳樓上東上閭門官承旨錄訖以紅條袋降制  
樓下東上閭門官承旨退降王以下俯伏東上閭門官至  
令通事舍人掖之起首領以下皆起鞠躬閭門宣有敕降

王以下再拜僧尼止躬呼萬歲閣門錄敕旨付管幹官降  
王等躬聽詰問如有復奏閣門錄訖仍以紅條袋引升樓  
如無復奏入內省官詣御坐承旨傳樓上閣門官稱有敕  
放罪訖舍人贊謝恩降王以下再拜稱萬歲復序立入內  
省官詣御坐承旨傳樓上閣門官稱有敕各賜首服袍帶  
樓下閣門官承旨引所賜檐床陳于西舍人宣曰有敕降  
王以下再拜鞠躬舍人稱各賜某物賜物畢又再拜稱萬  
歲若賜官即贊謝再拜並歸次易所賜服舍人先引降王  
以下至授遙郡以上當樓前北向東上立贊再拜稱萬歲  
又再拜次贊服冠帔婦女再拜僧尼別謝引還次贊樓上

侍立官稱賀再拜禮直官舍人分引百官橫行北向立贊  
拜訖班首少前俛伏跪稱賀其詞中書隨事撰述賀訖復  
位在位者又再拜舞蹈三稱萬歲又再拜東上閣門官進  
詣樓前承旨就班首宣曰有制贊者曰拜在位官皆再拜  
宣答其詞學士院隨事撰述又贊再拜三稱萬歲又再拜  
樓上樞密院前跪奏稱某官臣某言禮畢內侍索扇扇合  
簾垂帝降坐內侍贊扇開所司承旨放仗樓下鞭鳴百官  
再拜退開禧三年三月四川宣撫副使安丙函逆臣吳曦  
首并違制剏造法物所受金國加封蜀王詔及金印來獻  
四月三日禮部太常寺條具獻馘典故俟逆曦首函至日

臨安府差人防守殿前司差甲士二百人同大理寺官監  
引起都堂審驗奏獻太廟別廟差近上宗室南班奏獻太  
社太稷差侍從官各前一日赴祠所致齋至日行奏獻之  
禮大理寺殿前司計會行禮時刻監引首函設置以俟奏  
獻禮畢梟於市三日付大理寺藏於庫端平元年金亡四  
月京湖制置司以完顏守緒函骨來上差官奏告宗廟社  
稷如儀

田獵太祖建隆二年始校獵于近郊先出禁軍爲圍場五  
坊以鷺禽細犬從帝親射走兔三從官貢馬稱賀其後多  
以秋冬或正月田於四郊從官或賜窄袍煙韁親王以下

射中者賜以馬太宗將北征因閱武獵近郊以多盜獵狐兔者命禁之有衛士奪人獐當死帝曰若殺之後世必謂我重獸而輕人特貰其罪帝常以臘日校獵諭從臣曰臘日出狩以順時令緩轡從禽是非荒也回幸講武臺張樂賜群臣飲其後獵西郊親射走兔五詔以古者蒐狩以所獲之禽薦享宗廟而其禮久廢今可復之遂爲定式帝雅不好弋獵詔除有司行禮外罷近甸游畋五坊所畜鷹犬並放之諸州不得以鷹犬來獻已而定難軍節度使趙保忠獻鶻一號海東青詔還賜之臘日但命諸王略畋近郊而五坊之職廢矣真宗復詔教駿所養鷹鶻量留十餘以

備諸王從時展禮禁圍草地許民耕牧至仁宗時言者言  
校獵之制所以順時令訓戎事請修此禮於是詔樞密院  
奏定制度獵日五鼓帝御內東門賜從官酒三行奏鈞容  
樂幸瓊林苑門賜從官食遂獵于楊村宴于幄殿奏教坊  
樂遣使以所獲馳薦太廟既而召父老臨問賜以飲食茶  
絹及五坊軍士銀絹有差宰相賈昌朝等曰陛下暫幸近  
郊順時田獵取鮮殺而登廟俎所以昭孝德也即高原而  
閱軍實所以講武事也問耆老而秩飫所以養老也勞田  
夫而賜惠所以勸農也乘輿一出而四美皆具伏望宣付  
史館從之明年復獵於城南東韓村自玉津園去輦乘馬

分騎士數千爲左右翼節以鼓旗合圍場徑十餘里部隊  
相應帝按轡中道親挾弓矢屢獲禽焉是時道傍居人或  
畜狐兔鳬雉驅場中帝謂田獵以訓武事非專所獲也悉  
縱之免圍內民田一歲租仍召父老勞問其後以諫者多  
罷獵近甸自是終靖康不復講

打球本軍中戲太宗令有司詳定其儀三月會鞠大明殿  
有司除地豎木東西爲球門高丈餘首刻金龍下施石蓮  
華坐加以采績左右分朋主之以承旨二人守門衛士二  
人持小紅旗唱籌御龍官錦繡衣持哥舒棒周衛球場殿  
階下東西建日月旗教坊設龜茲部鼓樂於兩廊鼓各五

又於東西毬門旗下各設鼓五閭門豫定分朋狀取裁親  
王近臣節度觀察防禦團練使刺史駙馬都尉諸司使副  
使供奉官殿直悉預其兩朋官宗室節度以下服異色繡  
衣左朋黃襯右朋紫襯打毬供奉官左朋服紫繡右朋服  
緋繡烏皮韁冠以華挿脚折上巾天廄院供馴習馬并鞍  
勒帝乘馬出教坊大合涼州曲諸司使以下前導從臣奉  
迎既御殿群臣謝宣召以次上馬馬皆結尾分朋自兩廂  
入序立於西廂帝乘馬當庭西南駐內侍發金合出朱漆  
毬擲殿前通事舍人奏云御朋打東門帝擊毬教坊作樂  
奏鼓毬既度颶旗鳴鉦止鼓帝回馬從臣奉觴上壽貢物

以賀賜酒即列拜飲畢上馬帝再擊之始命諸王大臣馳  
馬爭擊旗下掘鼓將及門逐廂急鼓毬度殺鼓三通毬門  
兩旁置繡旗二十四而設虛架於殿東西階下每朋得籌  
即挿一旗架上以識之帝得籌樂少止從官呼萬歲群臣  
得籌則唱好得籌者下馬稱謝凡三籌畢乃御殿召從臣  
飲又有步擊者乘驢騾擊者時令供奉者朋戲以爲樂云  
赦日伐鼓建隆元年司天監言日食五月朔請掩藏戈兵  
鎧胄事下有司有司請皇帝避正殿素服百官各守本司  
遣官用牲太社如故事景德四年五月朔日食上避正殿  
不視事至和元年四月朔日食既內降德音改元易服避

正殿減膳百官詣東上閣門拜表請御正殿復常膳三表  
乃從至日遣官祀太社而陰雨以雷至申乃見食九分之  
餘百官稱賀先是皇祐初以日食三朝不受賀百官拜表  
嘉祐四年詔元旦日食母拜表自十二月二十一日不御  
前殿減常膳宴遼使罷作樂至日仍遣官祀太社百官三  
表乃御正殿復膳六年六月朔日食詔禮官驗詳典故皇  
帝素服不御正殿母視事百官廢務守司合朔前二日郊  
社令及門僕守四門廵門監察鼓吹令率工人如方色執  
麾旂分置四門屋下龍蛇鼓隨設於左東門者立北塾南  
面南門者立東塾西面西門者立南塾北面北門者立西

墊東面隊正一人執刀率衛士五人執五兵之器立鼓外  
矛處東戟處南斧鉞在西稍在北郊社令立積於壇四隅  
紫朱絲繩三匝又於北設黃麾龍蛇鼓一次之弓一矢四  
次之諸兵鼓俱靜立俟司天監告日有變工舉麾乃伐鼓  
祭告官行事太祝讀文其詞以責陰助陽之意司天官稱  
止乃罷鼓如霧晦不見即不伐鼓自是日有食之皆如其  
制治平四年詔古者日食百司守職蓋所以祗天戒而備  
非常今獨闕之甚非王者小心寅畏之道可令中書議舉  
行熙寧六年四月朔日食詔易服避殿減膳如故事降天  
下死刑釋流以下罪政和上合朔伐鼓儀有司陳設太社

玉幣籩豆如儀社之四門及壇下近北各置鼓一並植麾  
旂各依其方色壇下立黃麾麾杠十尺旂八尺祭告日於  
時前太官令帥其屬實饌具畢光祿卿點視次引監察御  
史奉禮郎太祝太官令先入就位次引告官就位皆再拜  
次引御史奉禮郎太祝升就位太官令就酌尊所告官盥  
洗詣太社三上香奠幣玉再拜復位少頃引告官再盥洗  
執爵三祭酒奠爵俛伏興少立引太祝詣神位前跪讀祝  
文告官再拜退伐鼓其日時前太史官一員立壇下視日  
鼓吹令率工十人如色服分立鼓左右以俟太史稱日有  
變工齊伐鼓明復太史稱止乃罷鼓其日廢務而百司各

守其職如舊儀

志卷第七十四